

Ekonomi Malaysia dijangka berkembang pada 4.5% tahun ini

Oleh HENDRA WINARNO
hendra.winarno@mediamulia.com.my

PETALING JAYA: Keluaran Dalam Negara Kasar (KDNK) Malaysia dijangka tumbuh sebanyak 4.5 peratus tahun ini, lebih rendah daripada 5.0 peratus yang diunjurkan bagi 2025, menurut penganalisis HSBC Global Investment Research.

Ketua Ekonomi Asia dan Pengetua Bersama Penyelidikan Global Asia, Frederic Neumann berkata, angka itu masih mencerminkan ketahanan ekonomi yang kukuh, sebahagiannya didorong oleh pelaburan berterusan dalam negara.

“Prestasi tersebut disokong oleh pelaburan infrastruktur yang stabil serta aliran masuk pelaburan langsung asing (FDI) yang berterusan.

“Peluasan FDI dalam beberapa tahun kebelakangan ini turut meningkatkan kapasiti produktif ekonomi Malaysia. Dari sudut daya saing, Malaysia kekal menarik khususnya dalam sektor elektronik dan rantaian bekalan semikonduktor.

“Walaupun negara ini tidak terlibat secara langsung dalam pengeluaran cip berprestasi tinggi seperti Taiwan dan Korea, Malaysia tetap mendapat man-



HSBC Global Investment Research mengunjurkan ekonomi Malaysia tumbuh sebanyak 5.0 peratus pada 2025.

faat daripada ekosistem global yang lebih luas, termasuk peningkatan permintaan terhadap elektronik berkaitan kecerdasan buatan (AI),” katanya dalam sesi webinar Ramalan Asia 2026 HSBC di sini, semalam.

Menurutnya, HSBC kekal

optimistik dan menjangkakan aliran masuk FDI ke Malaysia akan terus bertahan, didorong oleh kedudukan negara dalam rantaian bekalan global.

Dalam perkembangan berkaitan, beliau berkata, HSBC tidak menjangkakan Rizab

Persekutuan (Fed) Amerika Syarikat (AS) akan menurunkan kadar faedah dalam masa terdekat.

“Ekonomi AS dijangka berkembang 2.3 peratus pada 2026, meningkat daripada 2.2 peratus pada tahun sebelumnya.

“Ekonomi AS masih menerima sokongan daripada pemotongan cukai, ledakan permintaan perkakasan AI, paras harga ekuiti yang tinggi serta penurunan kadar faedah gadaian.

“Justeru, HSBC melihat tiada justifikasi makroekonomi yang kukuh untuk Fed menurunkan kadar faedah secara agresif pada tahun ini,” ujarnya.

Menyentuh mengenai pasaran ekuiti Malaysia, beliau berkata, secara keseluruhannya ia adalah hampir mendatar pada 2025 dalam nilai mata wang tempatan.

“Walaupun latar belakang makroekonomi yang kukuh, pasaran saham telah terbeban oleh aliran keluar pelabur asing yang berterusan, sentimen yang lembap dan jangkaan keuntungan yang rendah.

“Tekanan jualan daripada pelabur institusi asing (FII) adalah berterusan dengan ia menjual kira-kira AS\$5 bilion ekuiti Malaysia pada 2025 menjadikannya jumlah aliran keluar tahunan terbesar sejak 2020.

“Konsensus menjangkakan pertumbuhan keuntungan hanya satu peratus pada 2025, meningkat kepada lapan peratus pada 2026,” katanya.